

समे — 12:25

<><><><><><>

Pulwama Attack

अज्ज पुलवामा हमले दी बरसी ऐ। 14 फरवरी 2019 गी सीआरपीएफ दे काफिले पर इक आतंकवादी हमलावर नै विस्फोटक कन्नै भरोची दी गड्डी गी टकराई दित्ता हा। इस हमले च 40 कर्मी शहीद होए हे ते केई सारे जख्मी होए। प्रधानमंत्री नरेन्द्र मोदी होरें इस हमले दी बरसी पर शहीदें गी श्रद्धांजलि भेंट कीती। अपने सोशल मीडिया पोस्ट च मोदी होरें आखेआ जे औने आलियां पीढ़ियां शहीदें दे बलिदान ते राष्ट्र प्रति उंदे अटूट समर्पण गी कदें बी नेई भलाग। 6एं ब'रें पैहले अज्जे दे दिन जम्मू कश्मीर दे पुलवामा जिले च आतंकवादी हमला होआ हा, जेह्दे च 40 जवान शहीद होए। गृहमंत्री अमित शाह होरें बी शहीदें गी श्रद्धांजलि भेंट कीती। उनें आखेआ जे आतंकवाद मनुखता दा सब्बने थमां बड्डा दुश्मन ऐ। उपराज्यपाल मनोज सिन्हा होरें बी बहादुर ते दलेर शहीद जवानें गी श्रद्धांजलि भेंट कीती। उनें अपने सनेह च आखेआ जे उंदा बलिदान पीढ़िएं गी प्रेरित करदा रौहग।

<><><><><><>

LG Security

उपराज्यपाल मनोज सिन्हा होरें कल इक उच्च सतह दी बैठक दरान जम्मू खित्ते दी सुरक्षा स्थिति दा जायजा लैता। उनें अधिकारिएं गी हिदायत कीती जे ओह आतंकवादिएं दे सफाए ते उंदे ढांचे ते उनेंगी मदद उपलब्ध करोआने आलें गी पूरी चाल्ली नष्ट करने लेई कारगर गैह पुट्टन। उनें जोर देइयै आखेआ जे आतंकवादिएं दे सहायकें ते एह्दी साजश रचने आलें खलाफ सख्त कारवाई होनी लोड़चदी। उनें स्टीक खूफिया जानकारी, आतंकवाद रोधी अभियानें ते सारी चुनौतिएं खलाफ तैआरिएं पर जोर पाया। आतंकवादिएं गी माली ते होर दूई लोड़चदी मदद उपलब्ध करोआने आलें खलाफ सख्त कारवाई दी उने उनें गल्ल कीती। उनें आखेआ डर-त्राह फैलाने आली कारवाइएं गी बी आतंकवाद आला लेखा गै समझेआ जाना लोड़चदा ते उंदे खलाफ कनून तैहत कारवाई कीती जानी लोड़चदी।

<><><><><><>

Jal Shakti

जम्मू कश्मीर दे ग्रामीण इलाकें दे 80 फीसद घरें गी नलकें राएं पीने आले पानी दे कनैक्शन उपलब्ध करोआए गे न। एह गल्ल जल शक्ति मंत्री सी.आर.पाटिल होरें लोकसभा च आक्खी। अगस्त 2019 च जल जीवन मिशन दी शुरूआत मगरा नलकें राएं पीने आला पानी उपलब्ध करोआने दे कनैक्शन च 80.87 फीसद दा बाद्धा होआ ऐ। उसलै 5 लक्ख 75 ज्हार घरें च नलकें राएं पीने आला पानी उपलब्ध हा ते हुन 15 लक्ख 55 ज्हार घरें तगर एह सुविधा हासल ऐ। मंत्री होरें जानकारी दित्ती जे जल शक्ति अभियान कैच द रेन अभियान दी अमलावरी दा मकसद बरखा दे पानी दा संरक्षण करना। उसी किट्ठा करना ऐ ते एह्दे राएं जमीन हेठ पानी गी बधाना ऐ। इस अभियान च महिलाएं दीखास भूमका गी उजागर कीता गेआ। इस अभियान गी खत्म होने च किश गै म्हीने रेइ गेदे न ते जम्मू कश्मीर इस लक्ष्य गी हासल करने च सेई दिशा च कम्म करा'रदा ऐ।

<><><><><><>

Water Shed Yatra Ramban

रामबन जिले दे उखराल इलाके च कल वॉटरशेड यात्रा अभियान 2025 दी शुरूआत कीती गई। इस यात्रा दा सरिस्ता प्रधानमंत्री कृषि सिंचाई योजना 2.0 दे तैहत् कीता गेआ ऐ ते रामबन च इस अभियान दी शुरूआत उत्थुआं दे डिप्टी कमीशनर बसीर—उल—हक चौधरी हुंदे मार्गदर्शन च कीती गई। यात्रा दा उद्घाटन डीडीसी अध्यक्ष रामबन डॉ. शमशादा शान ते रामबन दे विधायक अर्जुन सिंह राजू होरें कीता। अभियान च बरखा दे पानी गी बचाने, बूहटें गी लाने ते सामुदायिक भागीदारी गी बढ़ावा देने पर जोर दित्ता जाग। इस अभियान दे राएं उखराल च 33 सौ हेक्टेयर जमीं गी इस चाल्ली बनाया जाग तां जे उत्थें पर्यावरण संतुलन ते पानी गी बचाया जाई सकै।

<><><><><><>

Divya Kala Mela

अज्ज थमां जम्मू च दिव्य कला मेला शुरू होआरदा ऐ। इस मेले च देश भर दे हुनरमंद दिव्यांग कारीगर ते उद्यमी अपनी प्रतिभा दा प्रदर्शन करगन। दिव्यांगजनें गी सशक्त बनाने आले मैहकमे पास्सेआ आयोजित एह मेला 24 फरवरी तोड़ी चलोग। मेले च हस्तकला, हथकरदा, घरें दी साज—सजावट आले समेयान, पर्यावरण दे अनुकूल उत्पाद, गैहने ते होर केई चीजें गी 20 राज्यें ते केन्द्र शासत प्रदेशें थमां आए दे 100 शा मते कारगिर पेश करगन। इस मेले दा उद्घाटन अज्ज संजा 4 बजे केन्द्री समाजिक, न्याह ते सशक्तिकरण मंत्री हुंदी मजूदगी च कीता जाग।

<><><><><><>

Div Com

डिवीजनल कमीशनर जम्मू रमेश कुमार होरें सुरईसर—मानसर वन्य जीव अथ्यारणय दे पर्यावरण साबै जेहड़े संवेदनशील इलाकें न उंदे लेई जोनल मास्टर प्लान बनाने आस्तै कल इक महत्वपूर्ण बैठक दी अध्यक्षता कीती। बैठक दरान रमेश कुमार होरें अभ्यारणय दे 10 किलोमीटर दे दायरे च संरक्षण आले उपाएं गी सख्ती कन्नै लागू करने पर जोर पाया। बैठक चसांबा ते उधमपुर दे डिप्टी कमीशनरें दे कन्नै कन्नै रीजनल वाइल्ड लाईफ वार्डन ते होर केई अधिकारी बी मजूद हे।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर—अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 फरवरी 2025 थवां पैहले—पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><